

Seni Preseten  
Dieter F. Uchtdorf

Aruemonun Chon Aninis non  
ewe Aewin Presetensi



# Ewe Fansoun Och ne Afotukatiw Efoch Ira

**N**on Rome me noom, Janus I ewe kotun poputa. Ra chungani fan chommong ren ruu mesan—ren eu a kunu ngeni ewe fansoun a no, me ewe eu a nenengeni ewe fansoun epwe eto. Ekkoch fosun fonu ra iteni ewe maram January mwirin I pun ewe poputan ewe ier a eu fansoun ekiem me kokkot.

Fitu ngoru ier mwirin, chommong aramas won unusen fonufan ra sopweno ei orenien fori kokkotun siwin fan itan ewe ier mi fo. Pungun, forun ewe kokkotun siwin mi mecheres—ach apwonueta ewe kokkot a eu mettoch mi unusen sokkoseni.

Emon mwan a fori echo tettenin an kewe kokkotun siwin an ewe ier mi fo a mefi och usun an foffor. A pwisin ekiem, “Tori iei, ua fiti ai we kokkotun kekis, use mwo songokai, ua fiti ai we kokkotun moni, me use mwo fan eu fosunganu ren ewe konak noun ewe chon unukui. Nge ikenai a Januray 2 me ewe esisinen neno a keran tik me a tori fansoun ai upwe pwata. Epwe namwot eu manaman pwe upwe sopweno.”

## Poputa Sefan

A wor eu mettoch mi wesen awora apinukunuk ren eu pop sefan. Nge ai nuku pwe fan eu ika fan ekkoch kich meinisin sia mochen sipwe pop sefan ren eu uruo me tonano.

Ua sani ai upwe angei eu computer ren eu hard drive mi nimenimoch. Ren och fanosun a angang unusoch. Nge nupwen ekkewe ran me wiik ra no me chommong prokram ra tonong non ewe computer (ekkocho ren ach pwisin fori, ekkoch ren ach sise fen mochen fori), ewe computer epwe poputa ne mangano, me mettoch a fen mwitir me akkomw mi kan mang. Fan ekkoch ese fen mochen pwak. Ach mina epwe poputa a pwan weires nupwen ewe hard drive a uren mettochun osukosuk usun uruon computer mi taropas. Fan ekkoch ewe eu chok anen forseffani ach sipwe tonu unusan ewe computer me poputa sefan.

Aramas ra pwan tongeni uren mettochun osukosuk ren niuokus, tipewmwaramwar, me niamam mi chou. Ach kewe mwanino (ekkewe sia pwisin fori are fori ren ach sise fen mochen) ra tongeni chou woch tori a niki-nikin a kan weires ach sipwe fori met ururun sipwe fori.

Non pekin tipis, a wor eu angangen tonusefan sia iteni aier mi mut ngeni kich ach sipwe tonu ach kewe pwisin hard drive ren ekkewe mettochun osukosuk mi kan chou won netipach. Ewe kapas allim, me ren ewe Achasefanin Jises Kraist mi amwarar me atong, a pwar ngeni kich ewe an ach sipwe nimeti ngunuch seni ewe nimengauen tipis me winiti minefo, nimoch, me unusoch usun emon semirit.

Nge fan ekkoch pwan ekkoch mettoch ra amangakich me epetikich, me esenipato ekiem mi nusmwan me foffor mi fen aweiresi ach sipwe poputa.

### **Wau ewe Aramasoch non Kich.**

Forun kokkotun mochen a eu mettoch mi murinno. Sia sinei pwe mi wor an Semach won Nang kewe kokkot pokiten A ereni kich pwe An angang me an ning pwe epwe esenipato manau fochofoch me manau esemuch an aramas meinisin (Moses 1:39).

Ach pwisin kokkotun mochen a tongeni wau ewe aramasoch non kich. Nge, eu ekkewe mettoch mi orukuruku kich non ach achocho ne apwonueta ach kokkotun siwin mi ach amangano ach angang. Fan ekkoch sia amangano ach poputa, ren ach witi ewe fansoun mi fich ne poputa—ewe aewin ranin ewe ier, ewe nepoputan atun pwich, nupwen sia kokko ngeni wisen pisop are presetenin Fin Anisi, mwirin ekkewe semirit ra tonong sukun, mwirin sia asoso seni angang.

Ese namwot kapasen etiwetiw ren om kopwe poputa ne fetan ngeni om kewe kokkotun mochen mi pung. Ese namwot kopwe angei mwumwuta pwe kopwe winiti ewe emon ita ururun kopwe winiti. Ese namwot emon epwe tingorek ne angang non ewe Mwichefen.

Fan ekkoch sia tongeni asonapa chommong ier-in manauach ne witi ach sipwe kefin (nengeni D&C 121:34–36). Nge ese pung ena. Ka fen kefin!

Fan ekkoch non manau ei a wor pwinin use mour ren ai ua weires ren osukosuk, noninen, are pwisin netipengau. Nge ese nifinifin aukukkun kirochun ewe pwin, ua chok angei pochokun seni ei ekiem: nesesor ewe akkar epwe tota.

Ren iteitan ran mi fo, eu mesen ran mi fo a pwan feito—esap chok fan itan fonufan nge pwan fan itach. Me ren iteitan ran mi fo a feito eu tufichin poputa mi fo—eu tufich ne pop sefan.

### **Nge Met Ika Sia Kuf?**

Fan ekkoch nioukus mi ewe mettoch a epetikich. Meni sia niuokus pwe sisap tongeni apwonueta, pwe sipwe apwonueta, pwe sipwe mefen, pwe ach

apwonueta epwe siwinikich, are siwini ekkewe sia tongeir.

Iwe sia witiwit are fangeta.

Pwan eu mettoch sipwe chechemeni ren ach fori kokkotun ach kewe mochen a ien: Naman sipwe kuf—non ewe fansoun mochomoch. Nge siwinin ach sipwe netipengau, sia tongeni pochokun pun ei weweiti a angei senikich ewe ekiem ach sipwe fen unusoch iei chok. A esinna seni nepoputan pwe fan eu are pwan eu fansoun, sisap naf. Ach sinei ei me akkomw a angei senikich ewe mefian mairu me netipengauan ach kuf.

Nupwen sia fetan ngeni ach kewe kokkot iei usun, ach kuf ese epeti kich. Chechemeni, ina mwo ika sise tori ewe ennetin, ach mochen iei chok, sipwe fen pochokununo ren an sopusop won ewe an mi emwen ngeni.

Me a auchea ena—a watte auchean.

Ina mwo ika sisap naf ne tori muchun, ach sopweno won ach sai epwe anapano kich seni akkom.

### **Iei Ewe Fansoun Mi Och ne Poputa**

Eu porausen noom a apasa, “Ewe fansoun mi och ne fotukatiw efoch ira mi 20 ier mwen iei. Iei ewe oruan fansoun mi och.”

A wor och mettoch mi amwarar me awora apinukunuk usun ewe kapas *iei*. A wor och mettoch mi apochokun usun ach finata ne fini iei, sia tongeni fetanano iei chok.

*Iei* ewe fansoun mi och ach sipwe poputa ne winiti ewe emon sia ennetin mochen winiti—esap chok 20 ier seni ikenai nge pwan ren fansoun esemuch.

---

### **AFANAFAN SENI EI POR AUS**

Preseten Uchtdorf a awewe pwe ika sia kuf ren ach apwonueta ach kewe kokkot, “sipwe tongeni pochokun. . . . Ina mwo ika sisap naf ne tori muchunon, ach sopweno won ach sai epwe anapano ochun kich seni akkom.” Kopwe tingorei chon famini ar repwe poraus usun fansoun a watte met ra kaeo seni ar fori nap seni met ra kaeo seni niwinin nupwen a wes, usun sochungio seni sukun are angei och sokkun esisinen angoch.

## Anapano Om Aramasoch Ukukun Om Tufich—Poputa lei

**P**reseten Uchtdorf a aiti pwe “kokkotun mochen ra tongeni pwarau ach aramasoch.” Ekieki usun om kopwe fori ekkoch kokktun mochen non ruu ika unungat kinikin non manauom, usun pochokunuen inis, pochokunen ngun, me chiechi, ren awewe chok. Met sokkun mettoch ka mochen epwe fis non ekkei unungat kinikin non ei ier? Nupwen ka ekipwichi ekkoch kokkotun mochen non iotek, tumunuoch pwe ir repwe tufich nge epwe anamwota om kopwe martia. Non om puken porausen manauom, kopwe makkei usun om kewe kokkotun mochen pwe kopwe tongeni kuna om marita nupwen a much ewe ier.

© 2014 seni Intellectual Reserve, Inc. Meinsin pung mi kawor. A för non Amerika. Kapungunon non fosun Merika: 6/13. Kapungunon chiakun: 6/13. Chiakun *First Presidency Message, January 2014*. Chuukese. 10861 901



# Ewe Popun mi Pin an Jises Kraist: Nenien Appiru

Nuku, Famini, Aninis

*Kaeo me iotek usun ekkei mettoch me kutta om sinei usun met kopwe poraus usun.  
Ifa usun om weweiti usun manauen me popun ewe Chon Amanau epwe anapano om  
nuku non I me efeiochu ekkewe ka tumunu me churi ren wisen an fefin chon amwa?  
Ren pwan ekkis poraus, kopwe nengeni reliefsociety.lds.org.*

*Lei ei kinikin non chommong Porausen  
an Fefin Chon Amwa mi pachenong  
kinikinin popun ewe Chon Amanau.*

**N**upwen sia weweiti pwe Jises Kraist I ach nenien appiru non mettoch meinisin, sia tongeni anapano ach mochen ne tapweno I. Ekkewe pukfel ra uren kapasen apochokun usun ach tapweno mwirin ipwepin Kraist. Ngeni ekkewe Chon Nifai, Kraist a apasa, “pokiten oua kuna seni ekkewe angang ua fori, ina oupwe pwan fori usun chok” (3 Nifai 27:21). Ngeni Thomas, Jises a apasa, “Ngang ewe ann, ewe ennet o ewe manau. Ese wor emon epwe feinno ren ewe Sam ika ese punun ngang.” (John 14:6).

Ikenai nouch chon emwen ra achema ngeni kich pwe sipwe anenia ewe Chon Amanau pwe epwe ach nenien appiru. Linda K. Burton, presetenin ewe Fin Anisi Unusan, a apasa, “Nupwen emon me emon kich sia anommu ewe nongonongen ewe Achasefan anonnon non netipach, iwe sipwe poputa ne winiti ekkewe sokkun aramas ewe Samon a mochen sipwe winiti.”<sup>1</sup>

Preseten Thomas S. Monson a apasa, “Ach Samon me Chon Amanau, Jises Kraist, I ach nenien appiru me ach pochokun.”<sup>2</sup>

Sipwe finata ne arap ngeni Jises Kraist, me aneasosichi An kewe annuk, me achocho ne niwinsefan ngeni Semach won Nang.

## **Seni ekkewe Pukfel**

2 Nifai 31:16; Alma 17:11;  
3 Nifai 27:27; Moroni 7:48

## **Seni Ach Uruo**

“A esisinata ewe an me a emweni kich,” poraus mi makk seni Eliza R. Snow, oruan presetenin ewe Mwichen Fin Anisi Unusan, usun ewe afanafan fetan an Jises Kraist non inis.<sup>3</sup> A afanafan ngeni aramas pwisin—emon me emon. A aiti kich sipwe su seni ekkewe tiwe me tiu me amanau ewe emon mi rikino (nengeni Luke 15:3–7). A echikarata me aiti aramas pwisin, a pwan churri meinisin emon me emon non ewe mwichen 2,500 (nengeni 3 Nifai 11:13–15; 17:25).

Usun fin Aramas Mi Pin non Fansoun Soponon, Preseten Dieter F. Uchtdorf, Oruan Chon Aninis non ewe Aewin Presetensi, a apasa: “Ami fefin mi amwarar oua awora aninnis non tong ngeni ekkoch ren popun mi nap seni pwisin ami feioch seni. Non ei ka nikinikinin ewe Chon Amanau. . . . An ekiek mi chok kunu ngeni an anisi ekkoch.”<sup>4</sup>

## **ESINESIN**

1. Linda K. Burton, “Is Faith in the Atonement of Jesus Christ Written in Our Hearts?” *Ensign* are *Liahona*, Nov. 2012, 114.
2. Thomas S. Monson, “Meeting Life’s Challenges,” *Ensign*, Nov. 1993, 71.
3. “How Great the Wisdom and the Love,” *Hymns*, nampa 195.
4. Dieter F. Uchtdorf, “Happiness, Your Heritage,” *Ensign* are *Liahona*, Nov. 2008, 120.

## **Met Ua Tongeni Fori?**

1. Pwata me ifa usun Jises Kraist I ai we nenien appiru?
2. Ifa usun ai afanafan ngeni ekkewe fefin ua churi epwe anisie ne tapweno mwirin ewe Chon Amanau?